

三

迷

奇

三述奇卷三

鐵嶺
張德彝在初隨筆

貴榮竹坪校閱

庚午十有二月初六日丁卯陰午正哥士奇請星使遊同乘馬車出店行十餘里繞至山頂上有禮拜堂高約十二三丈廣數丈深十餘丈純以白石建造頂立一金人抱一幼孩即天主母也堂前臨大海後依村城名曰那歐塔達木得喇戛譯言救人聖母也下車步石木梯共百八十級入其門內其式與他堂大同小異惟上懸

小船數十長皆一二尺左右畫軸千張繪海船遭風顛沛之狀皆水手之遇險得脫者所獻與中土之供奉

天后娘娘同去此登車行二三里下車復步行數武入一大園園名高立巴那巴花木頗多雖屬隆冬依然繁盛枝葉被雨清潔如秋右有育瞽所亦高大壯觀後步石磴四十二級而下左右兩行式如拱手中一瀑布下流而成水法上下鐵闌石路平坦整齊繩而登車復遊十餘里見校馬廠與酒肆流泉水法花徑回環鳥多人少幽雅異常下山一路道逢泥濘樓房鄙陋破爛頽垣居

民半類乞丐。回寓後，有地方官布薈斐暨前四川主教
法^人范若瑟來拜。酉初微雪，晚餐得食蘋果與梨，皆大
於橙柚。成初傳達義復邀觀劇，固辭不獲，遂同慶齋堂
乘車行二里許，入一戲園。所演率皆平易，惟大海汪洋、
疎星皓月，尚屬精巧。看戲者武將頗多，子正回寓，聞是
日法邦外部大臣發福爾親至衛灑德營，與畢駒馬商
議停戰二十一天，畢對云：如欲停戰，須依德營十五款。
如左。

第一款

兩國免戰二十一日。自正月二十九日至二月十九日。
各營自守相距三十里。彼此界內可駐二國兵船自停。
戰後所有奪去之兵商各船皆當互還。惟有東邊三省
近德界之地不在免戰之例。

第二款

免戰之意係為法國辦理國政並保舉各省會堂之大臣
在波耳多城公議或戰或和官民往來須領路票到
德營查明蓋印方可行動。

第三款

巴里城外所有大小礮臺軍器村堡廬舍皆暫交德營掌管城邊礮臺彼此分立地界各選將官看守不得屯兵

第四款

巴里城上大礮移置城外礮臺令德兵看守

第五款

停戰期內德兵不許入巴里

第六款

城內兵勇水手不許出城亦不許擅動軍器只准一萬

二千持械為鎮紅頭作亂。其餘兵將德營另有拘留之地。以待會堂眾議定後。將所有照管城內將佐花名錄妥投送德營。僅停戰期內未有和好。將城內已降之人送回德營。各將官准去實劄存銷在身。

第七款

護軍持械守城。或有反亂之事。只得用三千五百名馬兵巡捕水龍勇等其鄉勇之首領出全一概不准。

第八款

自免戰後。德營礮臺前。有將軍為法採辦委員代謀轉

運便法、或入鄉村、或往外邦、各地輸運貨物入巴里。

第九款

自歸礮臺解甲及城上撤礮之後、一切照第五第八二款辦理。巴里轉運諸得自由、或在大道碼頭或在江湖海內、惟不准占據德兵所守之地、亦不准在德兵所守界內採買、如德將有令方可。

第十款

凡人出城各在法營領據、再至德營查考、此據惟保舉會堂之人可用、每日辰起酉止。

第十一款

巴里應出兵費三百四十萬兩此銀當于十五日內付訖

第十二款

在免戰期內不用契票改交現銀

第十三款

各物皆可轉運惟軍器不許進巴里

第十四款

免戰定後在阿美敦的洪或佛許爾等處將自戰迄今

德之被擒者開單呈送德營德營亦將法之被擒者開
單交法以便互易至德國商船人等亦如兵弁送回德
界

第十五款

凡巴里與外省往來書信不得封口必先送至衛灑德
營查看後方可投遞

法外部大臣持所約十五款回巴里與眾集議定否未
詳

初七日戊辰陰午正隨星使與哥士奇乘車行六七里

抵造胰局。樓高闊深均約七丈。地置甌缸八各深二丈。
周丈餘。右橫石箱十四各。周一丈六七尺深九尺。所用
材料。係鹹水與各種牛羊油。造法。係以機器于箱中磨
碎。運入缸內。加牛羊油。缸底連有熱氣筒。將胰熟。熟定
塊。每塊長約尺半。寬七寸。厚四寸餘。此係滑粗衣污布
用者去此。又行五里許。抵油作。亦一大樓。上有壓架六十
石磨四盤。串機二座。吹機四架。所用係胡麻與巨勝
子。造法。係以火機先串串機。用二石輪。周各丈餘。厚盈
尺。串畢。自運入石磨。磨亦甚大。磨罷吹皮。實自流下。以

麻布包成四方，邊約尺半，堆于壓架之中。壓架鐵鑄形如呂字，每架可置二十餘包。輪機動則下壓，油自流入桶內，壓畢，麻子成餅，厚六七分。匠人取而售之，可餵牛羊。每日得油五千餘斤，油色黃，貧民用以然燈，或以之膏車，及滑各種機器去此。折回十餘里，抵一棧房。房係民建，純以石鐵造成，樓七層，寬約六丈，長逾里。以氣機上下貨物，靈便異常。看其氣機，係二大鐵輪，前一水箱，作目字形，鐵輪旋轉速而力猛，不知吃若干馬力也。去此繞行十數里，至其新礦臺，極長，不甚高闊，卻極堅固。

直伸入海左右皆水下有巨石百方皆盈丈酉初回寓甚冷是日有本地總督茹艾達暨十總蒲占葉來拜晚有日本武教督卑路安携二日本武生來拜坐談片時而去又是日逢次見有法兵百餘徘徊一處抱肩蹲卧狼狽不堪蓋皆由印度埃及等國聚來者因法兵已失十分之三四故也法京被困之時有大官乘氣球欲逃不意行至半路落于德營奇甚又前日來拜之武官名傅達義者係奉命來此與兵購買鞋襪者彼尚遊玩看劇不以官事為重斯時城雖被困王雖被擒而閨閣市

廬仍是朝朝佳節夜夜元宵鼓樂喧天車馬震地可謂
燕雀不知大廈之傾也按德法雖經議定免戰尚未畫
諾而此日紅頭又亂滿街喧鬧經看衛兵攔阻而紅頭
縛其人于木板投諸河中擲石如雨繼用長杆插入水
底而死以致人心惶恐後日夜嚴防少為安帖

初八日己巳微晴冷已正隨星使往拜本地總督與主
教范若瑟未初一刻至火輪車客廳同哥士奇登車東
行二百五十里申初至拉薛村改乘馬車復至前所看
之船廠管廠官偕入廠內見木架上懸未畢工之輪船

一隻長三十餘丈據云往中土去者回入機器局見所造者並無輪機車船器具因是時法國軍務緊急將所有銅鐵改鑄破位長約七尺多由後腔裝藥者看畢登樓飲酒看船圖六七張酉正謝別出門見數粵人蓋在洋船為夏啦桑來此者土人前後追隨皆呼親親係以是二字為華言問好也戌正回寓近日街市間有武官驅車一輛上插國旗擊鼓往來乞錢以養受傷兵勇又有武官少婦胸挂十字小旗手持紅布袋迎人乞錢亦稱為養苦兵者是日法國發福爾與德國畢駒馬會于

衛灑德營將所定十五款畫押施行係西麻一千八百
七十一年正月二十八日

初九日庚午晴未初隨星使與哥士奇乘車行八九里至一處名曰巴蓄朗商係為通城集水處下車入鐵闢門左右四石臺上臥石獅揚爪縱身作奔馳狀左右各樓三層當中石碑以四十柱聯之通身白石建造前有瀑布後倚山岡面如山字正中牌上立三女皆赤臂跣足手持玩物下面碎石峻嶒水由中出湧落小池暗入鑑筒分流各處石上立水牛四頭左右大魚各四搖尾

決躋、悠揚、騰躍、皆作奔出之狀。遊人先登土岡，行數武，後步石梯八十級，至牌下石闌，入左樓門，再步石梯四十八級，則四壁懸碎石攢成大畫百張，皆係千古野獸、新奇形像，筆墨難描。又箱櫃百餘外，有玻璃罩內放各種鳥獸，裝飾得體，躍躍如生。下立長榻，羅列古魚、奇鳥、彩羽、錦鱗，筆難細述。中列玻璃罩匣數十，內係昆蟲萬種。第二層所別者，係人獸禽魚之骨式，與巴里之白骨樓同。每層樓高四丈，寬十八丈，長逾七丈。出此，入右樓門，其頭層四壁懸油工大畫三百餘幅，二層中間懸百餘

幅左右二間列白石人像二十餘門外兩壁二石畫係
馬賽二千年前與現今之景致江流山峙妙手通神去
此至瀑布後登梯四十六步至石牌頂四望通城畢見
此後花園紅紫芬芳亦頗幽雅西一水槽下流入園而
為瀑布外有石牆頂作石槽高與園齊土人云其長二
百餘里西北直抵他村是日男女老幼甚形擁擠得遇
拉布當內船主郭地陽後乘車繞行二十餘里至海邊
較前兩次景致尤佳道路修齊樓房密建日光入海紅
如火柱將下山見一輪船碎於海燈鐵帽之間者土人

云係六日前誤觸石礁，幸遊人三百一無所傷。申初回寓，有日本人山田正方者來拜，以筆坐談。令其以平假字書其名，乃又又又又寸力夕念曰亞馬大馬薩夏達。令書德明二字，係于又已トノ之己，其音未詳。伊言所有武生現皆宿於此地。馬賽大酒店內，其公使已經西去波耳多城矣。蓋當時會堂百官已立公舉名人遼爾者為伯理聖天德巴里雖已停戰，而紅頭時時反亂，故移會堂與外部於巴里西南之波耳多海口。各國駐劄公使亦多因而移去焉。是地距巴里一千七百四十里有。

奇入夜微風涼

初十日辛未晴辰初隨星使同哥士奇殷柏爾薄郎等乘車至南海輪車客廳少坐登車東行少南遇山洞七村鎮九行二百一十里已正一刻抵杜隆莊改乘馬車行半里有本地水師提督之委員迎入都龍店內早餐樓高五層亦屬華美午初往拜提督貳狄婁入門有兵十名鼓吹相迎見畢排對護送行五六里入機器局登小輪舟其地臨海與莊右喇賽安村合而成口兵船密列兩岸多設礮位凡機器局與造礮局中作工者皆係

罪犯兼有德兵共萬餘人著紅衣黃褲其戴紅帽者在此一年或半年戴綠帽者一世並有以鐵鎖練于一處而作工者行里許先登兵船名曰馬蘭溝純以鐵鑄長四十丈闊四丈深八丈重七千噸合中國一千四百萬斤有一千二百馬力登岸入造礮局銅鐵大礮炸礮噴礮長圓礮子院內羅列成山樓上四壁布滿槍刀列成類難盡述有四百年前之鐵礮長逾二尺粗合把亦由礮頂下藥據土人云自古已有是法奈代遠年湮無從考査今復由名人創造非新式也又有一種法邦新出

之槍名沙斯坡歐者，稍亞於德義志之巧鍼槍。一分時之工可放十子，又入一樓，係以舊礮改造螺螢槍處出門，臨岸立一鐵造搜物機，形如仄字，高約十丈，無論何等重物皆可搜之，登舟上岸。又一物名木勺舖，乃中土所謂之水雷，係以鐵造，形若扁鑪，可裝火藥三千斤，沉入海心，上飄小物，中連電線，無論大小兵船觸即轟碎。又一鐵甲兵船甚大，其名未詳，或云可載兵三四千名，又一隻合眾國船，無事時可將後輪繫起乘風，以省煤費，岸邊有修船池四五，各作斗形，前橫鐵閘，後三面以

石砌上下石磴四十一級其小者寬七丈長三十丈深三丈旋駕小輪舟出石牆曰內門口行六七里登大兵船名曰呐滿的係前四日由呢酒地方來者長三十丈寬三丈高四丈兵六百名皆列隊鳴鐘以待鐵礮二十二尊長皆六尺亦由頂上下藥者船主云不知貴星使及諸位光臨有失迎迓請飲三鞭一杯以申敬意該次又云各口兵船之酒食皆取給于此辭去復乘輪舟至對岸風平浪靜四壁皆山哥士奇云此口水甚深廣帆檣之集於此者往來不絕上岸看一樓係犯人臥室小

屋鱗次，皆置木牀毡被，以便犯人棲止。所作各種器皿，排列出售。遊人多給錢而不取物。樓上有火機磨麪滿屋長箱，一人可作百人之工。又一存酒樓，酒箱大於小屋，運動皆有關鍵，無須人力。下樓見一修船處，係一高台，形如門字，甚屬堅固。無論何船，可以水機拽上，其力可知矣。又一新造兵船，名曰法邦者，長逾三十丈，闊三丈餘，高數丈，重四千噸，合中國八百萬斤，有五百馬力，本價二百二十萬方合銀二十八萬六千兩，又有數處，皆以火機鑄鐵鋸木之所，式與他處同。又有礮車若干。

土人一一與看謝別後乘雙馬車行十餘里申正上大輪車即開戌初一刻抵寓是日往來一路左臨大海右傍山村田疇交錯山嶺峻嶒同時見落日臨海隱於雲間光如巨火忽方忽圓忽而兩半忽而三分萬古靈鳥一時屢變可觀之至

十一日壬申晴已正隨星使乘車往拜總督茹艾達坐談片刻而歸其公署自八年前興工去歲告竣白石建造宏敞可觀其陳設之華美可謂巧奪天工矣

十二日癸酉陰已初細雨未正隨星使同哥士奇乘馬

車遊行八里許。河干有禮拜堂。尚未畢工。土人云。已造十八年矣。再須八九年。其工可竣。所用五色石塊。皆由義大利運來。堂高九丈。寬十丈。深二百五十八步。可容萬人。所費法方一千萬開。合銀一萬三千萬兩。精巧之極。時有教士四名偕遊。指講一切。後出旁門入一小屋。內有此堂之規模。長逾丈。高五尺。係以白石雕刻。雖具體而微。與真逼肖。蓋西俗。凡興造房樓。必先以石或木造成式樣。去此行里許。至其主教府。其人名布啦斯。服紅靴紫帶。金花邊坐。談待以葡萄糕。紅色酒。酒名什布啦。

味如松子。辭去北行十五六里至一糖房石樓九層地
極寬大通用銅器火機整齊潔淨上下羅列大箱萬萬。
先熬後壓清水淋出倒入鐵模而成塔糖其大者高約
二尺周尺五色白如粉每日可得二百餘斤其黃糖皆
來自印度每十斤黃糖可煉白糖八斤未刻回寫。

十三日甲戌晴辰初起身乘大輪車西行已正微陰至
達拉斯村停車片時小食後過倭吶江七孔鐵橋午初
雨未止申初至賽達莊住車半時晚餐得食白鱔味
似鱸魚石榴大於香瓜亥正抵都魯斯城改乘馬車行

四五里入店。店名艾達芋。不甚寬闊。尚屬淨潔。記來時過山洞五。中一大者。長十二三里。過村鎮四十六。其名無須繁述。沿路兵勇多有破靴散袴。背負紅酒罐。槍頭插麪包者。又一路左海右山。後則右海左山。忽又左右海。又當中鐵路。兩岸鷗鴨戲水。碧綠盈眸。又方的陽城外鹽積如山。又釀酒一種。甚甘。名與城同。

十四日乙亥晴。早起見店前正對官廨。日中為市。男女百人各來一車。支棚挂帳。儼成屋宇。所售器皿。鍼黹。以及糕果肉菜等類。往來瞻望者甚夥。惟見婦女多裹鬚。

鬚者、午初起身、登大輪車即開、西行少北、先見左臨運河、右傍山田、未初過大鐵橋、又度二小山洞、未正則左因右河、繼而左右皆河、又過一鐵練長橋、運河仍右、即時在艾根城、少住午酌、申初左河右山、又過三小山洞、共過莊村十四、酉初抵波耳多、乘馬車行十餘里、至賢真詹街、第二百八十號法人賴斯舉之別墅、樓高二層、房屋不多、裝飾樸素、前有馬廄車棚、後有園亭花樹、葱籠景致幽雅、亦有玻璃暖窖、望街樓等、又由馬賽、惟一洋僕名陶木斯、以便買辦日用之物、按外國各城無牆

而此地似在城外因街道空齊市塵稀少終朝聞寂絕少紅塵也由馬賽至波耳多計陸程二千零十六里

十五日丙子陰晴互變是日立春為正月節早餐見飯廳北壁懸一油畫不甚大所繪地如海口樹木蒼茫房屋隱約河水蕩漾山嶺峩峩中一禮拜堂外立五人似欲參拜者其工不奇惟堂頂懸一真表按刻擊鐘畫下垂一繩拽則作樂如堂中禮拜然晚見小兒放一風箏如北京幼童所放之門簾四塊瓦

十六日丁丑晴風和日暖的是孟春是日係禮拜之期午後男女老幼多扳牆攀樹以眺望華人該國自交兵

失利後人民禮拜尤勤門首多插十字花旗以明心。彝自航海以來凡遇法人彼必問景致之擅勝者以何國為最。彝則曰巴里人之公平溫厚以何國為最。彝則曰法眾皆喜聞且云我國各主教神甫之仁心善意海內皆知即如在貴國救護溺女一事想君已早知矣。彝云我國人民之多居天下三分之一苟有是說則華人定少於貴國矣今據往熙來比比皆是足見此說之誣也。聞者默然當晚皓月當空明星在望岸侵牀櫳春風襲人亥刻陰。

十七日戊寅細雨按其地之經度與中國之科布多庫倫同而其天氣之暖忽晴忽雨無雪無冰人不多衣樹不盡凋一似上洋之冬今是日午後有法人嚴布爾者與彝言君來此已三次以我國教化比之貴國似稍遜之彝詰其說彼曰我國男婦老幼相見皆以接吻為禮非為教化之國耶曰若以接吻而言我國父母之哺嬰兒往往有之此係喜愛之意不知貴國以接吻為何禮彼曰此係恭敬之意也彝曰若以此為恭敬則不如我國之跪拜為合宜矣再予之三次航海雖不多見少有

所聞以我國教化比之貴國亦似稍遜之彼請其說堯曰父母生子原望奉養終身不意貴國之人畢婚後即分居而另立門戶雙親雖老視若旁人子不侍父母媳不奉翁姑豈非少經教化者乎其人大慚面頰而退又英人白裏安者向堯云既來泰西三次何不將各國有用之物詳細記載歸告眾人令其勵學前進堯曰公曾往華一遊乎曰曾駐華八載矣堯曰既駐八年則我國有用之物亦必有所見聞彼曰所知甚夥堯曰諱必已告于眾矣曰尚未堯曰然則已稟之于君主矣其人俯

首無語。

十八日己卯陰雨因旅舍偏仄王竹軒與張雲波移宿于對門郎柏爾家戌初郎邀飲乃同俞惕盦步至其家見其妻女與子並其友畢羅蘇夫婦子女數人皆係由巴里逃至者飲酒食糕相談甚得見郎年逾古稀鬚髮頗白子女皆未及笄其妻云其長子郎為廉弱冠出征巴里四月未接家報不知尚在否言之慘然泣數行下郎撓其背始止以此見父母愛子天下通情但不知子念父母否

十九日庚辰陰，早蒙星使延請，法人名臘包耳者，以便慶靄堂溫習課藝。其人年約三旬，語言溫厚。每日辰初來已正去，所教係地理尺牘等書，每月館俸七十二金。又見對門石樓一所，門橫一匾，係小兒義塾，鎮日鳴鐘擊點，限時出入，頗為嚴肅。

二十日辛巳晴，未初同高引少慶靄堂薄郎乘車行三里，至集新院，因內現存軍器，故扃其門。入北行二里許，至公花園，一望繁盛，甚為整齊。中一鐵架玻璃房，極其高大，地含火筒，旁列水池，其花木有數千種，皆來自

五大洲多有未知其名者枝枝豔麗朵朵新奇有高二丈者有有花無葉者有葉無花者有花放葉上者有葉長花心者其葉有粗如指細如絲者有圓餅與舌形者花房前一小河人可駕舟而遊鷗鷺成羣金魚數百見人皆追逐浮沉似乞食狀又一小木橋彎曲盤繞如龍爪然隨處皆有鐵椅可以坐憩亦有鐵亭石闌作樂之所出此至一禮拜堂名曰賢米士愛堂不甚大惟左偏小屋立有男女老幼尸骸二十一具係于十七年前民變掘出者各處死尸皆已泥化惟距城四里許所出之

尸皮髮筋骨皆存衣服亦有黏留之處形狀可見有張口者閉目者抱肩者扶胸者形像不一竟有彎腰俯首者據土人云乃死而復甦欲出不得故也各男女名姓由何症而死者司堂人皆能細陳蓋墓前立有石碣註明某人何年月日由何病而死中有一家夫妻三子一女係誤食磨菇而毒死者其老者百歲少者幾月皆係六百年前或數十年前之人堂之對面石塔高三十八丈步石梯二百三十二級至其中腰盤頂四望無涯山河畢見塔頂尖形直立回時街市間遊數里過一大石

橋長約一里寬適六丈河名路旺碧浪溶溶舟艇密密按波耳多城內道途平坦惟多泥濘樓房銜接樸素整齊稍亞馬賽城周四十餘里居民二十三萬四十天時暖而多雨入夜微涼

二十一日壬午陰辰正風雨大作午初見法兵百名背巴荷戈破靴散袴結隊歌唱冒雨而行不知其從何處來者申初雨止戌正又雨因樓高四面無倚雨灑風吹聲音撼動與輪船行海相似其震懼亦可想見矣

二十二日癸未晴辰正微陰申初復雨又過步兵二百

隊伍不齊，入夜晴。

二十三日甲申晴。早見露結為霜。水始成冰。已初暖則皆化。午後同高引之慶鴻堂與薄郎乘雙馬車行數里至一公馬廠。係城中紳富養馬之地。每月給銀若干。此廠甚大。地鋪乾草。潔淨異常。馬共三十餘匹。中有尾大於駝而肥壯可觀者。後有操馬房。與前在英美所見者同。去此西北入鄉。周遊三十餘里。田疇肥沃。碧樹成行。竹窗草屋。景象清幽。間有高樓幾處。土人云。皆富室之別墅。因法邦久戰。所有近城一帶。樓房田畝。率挂木牌。

租售故有力者另覓桃源以享安樂也未正回寓是日
為禮拜之期登園角小樓一望牆外男女紛沓來看華
人有小攤出賣票擣其押賭者所畫六地係人心船錨
梅花葉星與六點其意未詳後有英國領事官何恩達
攜其子何益安來拜坐談片時去申初陰而細雨

二十四日乙酉終日陰晴風雨不定午初同俞惕盦乘
車北行十餘里至一鐵鍊橋名賢安得類長逾三里高
五六丈寬三丈餘分路三股除入水石座左右各五鐵
塔每塔十五層每層五六尺不等玲瓏剔透鐵鍊橫諸

塔頂左右各三十二條，兩首石砌，各長半里，下臨沙堤。中作月門，各高三丈五尺，又每對鐵塔當中亦作月門。其上橫疊鐵板，左右鐵闌，皆甚堅固精巧。土人云此橋造已五十二年，今則鐵皆糟朽，禁止行車。申初回寓，晚郎柏爾邀坐談，見男女十餘人，有郎之外，萬年近八旬，能英語。又其妻之姊妹四人，年皆四五旬者，同飲茶，與加非食糖果。郎云三日後，其外舅即攜眷回巴里蓋德法二國，將定和議，永息干戈。奈巴里食用不足，已食驛馬。今則貓鼠亦將覓盡矣。彝言貓性最喜捕鼠，若貓鼠

共食腹內恐不免騷擾矣眾皆大笑成初回寓

二十五日丙戌早大霧迷漫已初晴未正同俞惕盦出遊步至河岸一路人烟稠密大鋪宏敞華美一如巴里又一大戲園現改會堂五層高樓層層壯麗四面各石階八層白玉石柱十二根高皆四丈又河岸石樓前一銅鑄水法係三女赤身竝立各挾銅礮一門由礮心出水甚湧

二十六日丁亥晴暖午初有日本武士生六名及舉路安來拜遂留午酌得食蘋果皮如洋芋而味甘又有桃仁

栗子等其味亦佳。

二十七日戊子晴本地有種漆布長數丈寬二尺至八九尺不等條麻布上漆顏色花紋與真花梨紫檀無異亦有黑黃二色者黑者間有方塊周自八尺至十六尺繪以五彩金碧輝煌油布長闊皆六七八尺其色青黃白黑以之鋪桌做雨衣皆妙鋪地漆布寬窄不一厚而且固色分五彩花樣極多乍看以為木造席織或石砌紙糊者竟有造成假席或木與石者與真畢肖又種名紙色亦五彩與真太湖孔雀青金瑪瑙無異木紙亦與

松柏檀梨同以之糊飾牆壁真假難辨戊初郎柏爾請酌同坐十男一女皆紳富也談及三綱五常眾皆喜聞且云敝國風土人情較貴國不如多矣彝言天下萬國各有所長取長補短彼此有益又問中國食物同異彝曰中國平日所食與貴國大同小異惟燕窩魚翅海參魚肚蠔蠣海蜇江鯉柱及麻油豆醬之類在外少見眾云不惟不食是物且未聞是名望示其詳彝乃一一細告眾皆異之亥初回寓

二十八日己丑早大霧已正晴隨星使乘車往造烟局

一觀樓高而大所造係絲烟捲與鼻烟其鼻烟色黑而粗即華人所謂螞蟻烟女工二千餘名面前各置一表可知一刻造烟若干回時見一王宮古蹟名曰夏連大片石牆高皆數丈中有月門如城凋殘額朽寂寞荒涼土人云已千年矣申初同寓近日德法雖不交戰而街衢隊伍猶多然整齊者少或一鼓引十兵或十餘匹馬各戶小孩五六歲者亦著兵服佩刀街遊趣甚

二十九日庚寅晴午後同俞惕盦乘車行十餘里入一燒瓷局樓院高敞人工二千以機器磨沙與土其陶法

與中土同。瓷器大小形式不一。有印花者。係以暗花銅板塗色印於紙。將紙黏于瓷面。水洗片刻。則花朵如畫。分毫不損。未正同窩晚餐。得食冬筍鮮蘑海參魚翅花生杏仁梨橘蘋果等。酒則紹興酒與三鞭酒。彼此坐談守夜。以待新春樂甚。

同治十年歲次辛未

正月初一日辛卯晴。寅正隨星使至大廳。向北恭叩

聖牌行三跪九叩禮。早餐後同高引之乘車北行里許。至一花廠。內有玻璃房數間。列鮮花百餘盆。如竹葉梅。大紅

雀秋海棠馬尾草小芍藥玫瑰花酴醿凌霄芙蓉山茶
等類惟水仙一種質雖同於中土色則有藍赤者有葉如
百合花似丁香其色藍而味如椿高約三尺有葉如
倭瓜^瓜花似野菊其色紫其味香有葉如艾花似碎瓣梅
其色紅白者有葉如水仙花似玫瑰皮黃心赤可名為
獨角蓮者有枝如嫩松花密如鈴其色粉紅高約半尺
有葉如刺芭長枝盤繞花同蝴蝶梅者其條不可枚舉
花之矮小者分畦而栽之每畦上有玻璃罩買者隔罩
挑選弃乃擇其罕而見珍者買得八盆令人持去旋至

一禮拜堂，堂名賢徐林白石，建造高約七丈，闊如之深十三丈。牆垣多頽壞處，土人云亦數百年者。是日為禮拜之期，男女擁擠，數逾千百。有二十餘樂兵擊鼓吹號，俱有節奏。又至前所去之公花園，是日開骨畫二樓，先入骨樓，樓二層，所存係人獸禽魚之骨暨昆蟲石木之類。獸之奇者，有一羊二頭者，又有一頭二身，係後分前連前四股，左之右股，右之左股，併而上舉，人之奇者，有小兒一身二頭者，有二身連絡者，更有二三月胎內之小兒，長四五寸者，鳥有獨目生于頂上者，魚有穿山甲。

有形似蝙蝠者。有如合豚魚而滿身尖刺者。有小口小目身大於磬者。蟲有蛤蚌螺螄。大如西瓜。小如米粒。色分五彩。石有木變者。骨變者。有含花藏魚者。木有粗四五圍者。又一玻璃櫃中列阿斐利加之刀。搶衣履數件。與乾草大瓜二堆。瓜如人臂。肥而且大。後入畫樓。樓亦二層。所存畫軸十幅。亂置當地。因前日失慎。大半罹回祿之災。有一大幅。所繪係一船遭險。別船來救。男女皆攀繩抱木。倍極顛連。看久似聞有人喧浪湧之聲。此軸亦被烟熏。模糊大半。土人云。其價值銀二千六百兩。申

初回寓戊正同高引之俞惕盦慶寫堂與薄郎來雙馬
車北行四五里至格拉奚巷第二十四號路益戲園觀
劇臺座整齊鋪陳華美所演係義大利故事不甚開熱
惟末齣山林樓閣雷電奔馳山崩地裂水湧房搖令人
真假莫辨亥正回寓

初二日壬辰陰早有武官馬多文邀至本巷技勇營一
觀左右樓房中一花園列礮五門有一銅礮長六尺周
三尺餘心分二十四細孔藥由尾入放出如驟雨然左
樓為諸生肄業之所上懸各國地圖軍器圖式隊伍規

模下置紙筆書籍以便講求各種槍礮形式暨製造施
放之法武生共一百七名鎮日學習操演右樓為教習
考課之所前一大几壁挂黑木牌旁列木凳令諸生坐
教習以粉畫牌乃問某處有山某處有水我當何法對
陣何地扎營或某處有城我當如何進兵以及仰攻俯
擊之法諸生能對者為上否則一一講解是海國之重
武備不啻中國之重文教也未初細雨酉正微晴入夜
大雨

初三日癸巳陰晴不定時落細雨覺冷戌初復同高引

之諸君至路益戲園所演與昨大同小異惟中齣則有
著花秋帽全頂綠纓黃袍鑲紅大桂者有戴塔帽而著
黑衫者狀如魑魅因兩女子有著男衣而戴假面者離
奇怪誕頗快心目是園樂工五十名臺上懸煤氣燈一
百二十盞臺下懸插共三百九十五盞可容二千一百
餘人子初一刻回寓涼

初四日甲午早霧辰正晴午後有法國二主教來拜一
名巴貝多一名夏達類與慶寓堂暢談良久甚歡後巴
問彝係何教彝曰儒教問何不奉天主教彝曰孔門乃

中國之本教故不敢改問先以何教為上。彝曰某國人似當以某國本教為上且二教多同少異彼云二教所異者多矣君不知天主生已一千八百七十一年今之奉教者已有數國之多乎彝言此說固是然孔子已生二十餘年並無主教傳播異邦而今之崇奉者亦有數國之多乎二人無言辭去晚郎柏爾請茶同座有伊甥女菊桂然者年未及笄乞教華言遂以鉛筆書俗語二十句告其音義移時述對無差洵乃慧中秀外聰敏絕倫以擬黑齒國之才女殆不遜云

初五日乙未早大霧已初晴按自去歲十二月十八日為西麻二月初七日係耶蘇受四十日大難之始例應停止宴樂用無血齋四十日而此地人民喫肉者多甚有跳舞宴樂者亦無著異服戴假面遊于街市者每晚只聞一二人吹弄牛角酉正高引之復約同往觀劇辭謝未去慶靄堂與殷柏耳云德善之父請于初八日往阿拉夏尋村一遊彝乃登樓稟請星使報可

初六日丙申早起大霧見冰已正晴暖近日門首經過馬步隊伍稍為齊整而其軍器衣裝仍多破壞又聞自

去歲十二月初九日德法謀定停戰後至今已逾二十
一日而法會堂咸議再戰諸多掣肘乃于是日令伯理
璽天德遼爾攜外部大臣發福爾親往德營講和經德
君與畢駒馬議得十款遼爾攜回會堂公議計大僚五
百四十六員願畫諾者只百零七員而已按所議十款
如後

第一款

法國願讓與德東邊一省半地計六府一千七百六十
三村一百五十八萬四百七十四名口一切法例契券

皆去永歸德屬即時兩國各派委員前往分立界址所
派官員係為兩國清分地界與財物等事苟有不公不
明之處准其稟明國家俟換約後彼此各存地圖一張
惟東省之北拉佛爾礮臺仍歸於法可將去歲九月間
在柏爾林所畫者改色

第二款

法應償德兵費五十萬萬方年内即付一萬萬方分為
兩次每次五千萬餘歸三年分還由換約日起

第三款

自民會願准和好後彼此兩營定期將巴里城內外暨河邊各破臺與西南十五府及思安江右邊各地之兵退盡因法兵亦皆南退應准巴里屯法兵四萬以照管各破臺所有東北方德兵所據之地自換約日起隨時付銀隨時退兵按照第二款初次交五千萬方之日先退附近巴里之地二次付訖即將北方一帶退盡江東及巴里東北之破臺亦然至東方臨界之地或待全數五十萬_於交訖或法國言明先交保據契畢於德收執德兵即行退完若臨期未能全退應出官利五分由換約

日起每年照算。

第四款

所有德兵存留之地不許取兵餉收地租法國供其日用。

第五款

法國所讓之地其人民貿易如舊所立和約皆有一定之規妥為照料以益將來現在皆得任便自由或願歸德法何國或移去他邦德國概無禁阻其在所讓界內法國官員不得仍行拘人治罪亦不得代他人作主擅

理財產

第六款

法營被獲之兵尚未放還俟光定和約後急行解送法當預備大輪車前往德國議定解送法兵之費應按法國定例

第七款

條約定妥照前講和之規應在比利時國京都商定

第八款

條約定後各省德兵占踞之地盡文本地法官料理所

有德兵食用均照德營總軍辦理德兵住留之地德營派員往收稅糧與法國互相清算

第九款

和好已定應照前規無論德官何權皆不得行令于法
因現無德兵駐守

第十款

此十款應速呈波耳多民會妥為集議以取進止

初七日丁酉晴暖未初隨星使乘車至公花園風和冰解鳥語花香人之遊春者踵趾相接入骨樓復見一鹿

頭大如驢角長盈丈一魚肚大於鐘目小於豆嘴約一寸四牙外露二分水細小如耳又一海魚肉翅形如蝠
蝠鬚長頭小狀若老人其餘豺狼虎豹海馬斑驢金雞
鸚鵡鸞鶴鷗鷗罔不畢具申初回寓

初八日戊戌晴卯初睡起同慶鴻堂殷伯爾登火輪車
西南行一百五十八里已正抵阿拉夏桑村一路停車
五次樹林青蘚阡陌縱橫至則前臨海汊後傍山岡而
德善之父早已掃徑以待乃同步行登山磴雖盤繞路
極平坦左右環以木闌千峯疊秀曲徑通幽樓房點綴

松柏婆娑，緩步芳茵鋪翠。十里不遇一人，寂無音響。於山環處，忽見木樓一所，極其高大，乃仿華房造者。頂似城樓，座如廟殿，石闌瓦脊，頗為狀觀。數武外，又瞥見一樓，高插雲漢，亦仿中華殿閣建者。惟頂作半球形，滿鋪黃金，如俄國禮拜堂。一路逶迤曲折，下山步至其家，見其內眷談次，詢及德善起居，尋乃告以平安，無須挂念。眾皆悅之。早餐同坐，有其鄰居父女二人，父名鞠智晏，女名格秘，飯畢，在院中少憩。後同車出遊，先抵湖畔，步沙堤里許，潮長日落，掩映波光。又至山頂，見一望海臺。

純以鐵造高十數丈作丰字形登八十級至中層已四
面畢見村落不大槐柳成行鋪戶稀少房屋整齊下山
步入鞠家啜茶見四壁木槁設有中華瓶碟盤盃沈皆
上等申初告別再三婉留且云不知能再見于巴里店
尋言公務羈身不敢逗遛遂送至火輪車客廳夫妻囑
見德善告以一切平安不得遠懷等語言之悵然歎泣
即時開行頗快戌初回寓聞自前日德議十款法會堂
終日議論紛紛雖不欲和無法自處遠爾發福爾遂于
是日與畢駒馬同在衛灑畫押蓋印後書一十八百七

十一年二月二十六日衛灑立

初九日己亥晴暖早起見天光清朗微風習習乃口占八韻云好似清明節誰知正月天微風吹浪靜細雨注花鮮林內松垂翠河邊柳散綿田疇蔬菜遍山嶺橡楊速度數如回憶風光比蜀川因何涼過越卻竟暖於燕莫訝時差異方知地使然周遊千萬里冬夏日三遷初十日庚子早大霧辰初晴記前所看之洋水仙法人呼曰赭赤若婦人懷孕可卜熊蛇係將一紅一白同置于水自者先開為女紅者先開為男紅白齊開則為雙

生是日頗熱可著袷衣晚在園內緩步桃花吐萼碧柳垂絲而金菊地甚三月蘭蝴蝶梅皆已遍地矣

十一日辛丑晴近日連接洋信二函係一貧婦吳門麥氏者所發內云巴里被困三百三十餘日今幸逃此又值夫故無計謀生懇求施助若干以便度日憶在北京見有乞丐向洋人討錢者即叱退去不意至此數日即有婦人乞助以是觀之貧富何得以地限哉

十二日壬寅晴暖見園中杏樹兩行花如吐大滿徑幽香蜂蝶爭飛十分春色而遠近之楊柳榆槐參差偃蹇

碧綠盈眸，入夜則寒風襲被，惟有一縷鑪香，尚含暖意也。

十三日癸卯，晴暖，早起，則花香鳥語，日麗風清，緩步尋芳，頗饒佳趣。午後，同俞惕盦乘車街遊，見一種麻布甚長，寬逾五尺，灰質白花，極固，又一種存稿簿，長方紙甚薄，書信寫畢，中夾油紙，刷水置于簿內，再置于鐵夾板上，有活軸，轉則下壓，絕不費力，取出字皆印于白紙，而原信仍分毫無損。又近日牆外男女小兒爭討中華制錢，為奇物。

十四日甲辰晴午後同俞惕盦街遊見一大雜貨鋪樓高三層極其宏敞每層當中與四壁羅列雜貨萬種如紙筆綢布鐵木器皿婦女鍼黹小兒玩物以及瓷盆竹筐鋼鑼皮鼓無一不有筆難盡述每桌一人看守客買何物則守卓人同至大櫃言明物件若干價值幾何則掌櫃者隨聽以筆登記外書門票一張上印某城某巷第幾號某鋪字号何年月日賣去物件若干價值幾何若令持送則票邊另書姓氏住址無論何鋪皆如此大約夫賣貨而妻司帳者多又各鋪自備車軛每日按家

去送雖此須小物亦然小鋪無車則令夥計背揷所售
貨物門票逐件畫押以明貨價已收有不現給值者則
送貨人收訖畫押其價逾十圓者于收訖時必另貼一
小長方票亦為畫押否則官罰蓋票皆官出不得不取
償焉

十五日乙巳早霧已正晴晚則月午風清照如白晝乃
約德威理亞殷伯耳那威勇及薄郎四人共食羅列酒
肴同賀佳節杯盤狼藉散飲暢談亥正始散當晚果蔬
甚佳得食海參魚翅燕窩魚鴨等類櫻桃狀如李杏春

橘大如木瓜酒如中土紹興香烈醺人

三

十六日丙午晴涼已初陰雲四合細雨終朝近日頻聞車聲轔轔鈴響丁東雖在午夜其聲不絕蓋前于十一日因兩國換約有三萬德兵列隊入巴里齊唱凱歌由阿爾克得特立羊福大石牌樓直抵王宮後埃及石柱轉至馬達蘭禮拜堂各街巷口皆有本國兵弁持械嚴守以阻民人觀看

十七日丁未陰雨申正微晴亥初陰而復雨記本院有園丁夫婦戴姓者殷勤灌溉于花園之北偏種柳一圈

周約四丈。頂上交枝而成棚。內設圓桌小凳。亭外四面地分六畦。各作扇面形。每畦鮮花一種。如牡丹玫瑰。金菊。鐵梗海棠等類。畦邊鑲以地棊。芙蓉。此外桃杏蘋果。梨橘壽丹。行行夾道。頗覺可人。百樹交花。幽雅之至。

十八日戊申。陰雨稍冷。午後哥士奇來拜。坐談片時。辭去。見本地丐者之八音盒。長三尺。高二尺。寬一尺。外露一表。旁有鎖鍵。按節作樂聲。音洪亮。數里可聞。每箇價有值銀七八十兩者。丐者多由樂鋪貸出。每月給法圓十開二十開不等。終日背負穿巷遊街。欲乞錢。則在樓

前支以木架轉其機關而奏之願給者則于樓上以紙包錢而擲多者五六方少者一二蘇入夜微風雨止

十九日己酉晴暖早有郎柏爾之妻來請俞暢盦言其夫篤重病乞救之診係春瘟兩頰皆腫遂畀丸主一劑令鼻告以前服之法且言不可以風翌日必愈其妻拜謝當晚同眾在園內柳棚淪茗微風敲竹皓月映花因口占云萬个參差綠重臺掩映嬌一杯聊代酒寵辱亦堪消

二十日庚戌早陰細雨陣陣午後往看郎柏爾之病現

已消腫，乃另給一劑以去毒火，告以在室靜養為妙。卽
云勾勾臘局之東主，約去清帳。昨日未往，今早已疊令
人催請。彝言可以煖布圍頸，以防風氣，否則再犯，便難
著手。卽與其妻連應，唯唯少坐。各飲加非一盃，回寓。申
初晴，入夜復陰。

二十一日辛亥，陰雨已正晴。午後有房主之友來氏者，
同一官兵名過斯橋者，面懲惕，金診治，且云久聞名醫
來此，因貧苦求救，量不推辭。見其大指腫起不亞雞卵。
暢金乃給藥末一裹，湯藥一劑，告其煎法、敷法，拜謝而

去晚因郎柏爾病愈請暢盦與彝小酌果有櫻桃蘋果
地棊花生酒則舍利高纈釀芝柏都等同坐惟有伊甥
菊桂員菊桂然兄妹二人言其親友已回巴里矣因德
法早和城中安堵如初彼此暢談甚得深贊愧盦之能
寧脈通神為今時之和緩其病若經本地外科療治必
使其腫出割破見膿血而後已不知幾月方愈雖愈亦
必留有痕跡何能如此之速耶可見華醫與西醫各擅
其長並行不悖酒罷辭歸

二十二日壬子晴未初菊桂員約俞暢盦黃道榮與彝

同乘車行八九里至婁亢街第十號拜其教習高那昂。其人年約五旬，係患半身不隨者。鎮日坐一木椅，前後三輪，以手推柄，攸往咸宜。其師生相見，亦以接吻為禮。坐談良久，臨行求各書華字一篇去此。復遊公花園，是日係禮拜之期，又因德潤已和，人心安靜，街市往來，密若螻蟻。

二十三日癸丑晴涼，記西國男女喜養犬，多有以人名地名為名者。壯者可名卓安漢利，牝者可名美麗安呢。其來自巴里，即名為巴里，或犬主喜某處，或意在何人。

亦可命名。酉初一刻，陰雲四布，微雨，花香，碧樹沉沉，寒侵几榻。

二十四日甲寅，細雨未初晴，晚餐得食洋鰐魚，亦係扁形，腹緊肉厚皮，惟其烹調步異，以白水煮之外，加牛乳汁，或香菜末、青果油各少許，雖不如華羹鱸膾之美，而食之尚覺清鮮有味。記泰西人家日用食物，如油醋椒末、酒蝦醬油芥末等，皆盛瓶罐盒盃，鮮有買一二銅錢者，餘如鹹菜醃黃瓜豌豆橄欖蘿蔔既醬魚蝦等，亦皆按玻璃瓶罐馬口鐵匣出售。

卷三終